

II. PAZKO IGANDEA (A)

Otoitza

Betiereko errukiaren Jainko Jauna,
 Pazko jaietan berritu egiten duzu zeure herriaren fedea;
 haundi ezazu guregan Zuk emandako grazia,
 hobeto ikus dezagun, nolako Bataioak garbitu gaituen,
 nolako Espirituak biziberritu
 eta nolako odolak erosi.
 Zure Seme Jesu Kristo.

I. IRAKURGAIA: Ap Eg 2, 42-47

*Sinestedun guztiak batasunean bizi ziren;
 eta zeukaten guztia, guztientzat zuten.*

Apostoluen Eginetatik

Senideek zintzo irauten zuten apostoluen erakutsietan eta elkarte bizitzan, ogia zatitzean eta otoitzetan.

Jende guztia harrিতa zegoen, apostoluen bidez egiten ziren hainbeste mirari eta ezaugarriekin. Sinestedun guztiak batasunean bizi ziren; eta zeukaten guztia, guztientzat zuten; ondasunak eta gauzak saldu egiten zituzten, eta haiekin hartutakoa denen artean zabaltzen zuten, bakoitzaren beharrari zegokionez.

Guztiak bihotz batez igotzen ziren egunero jauretsera; beren etxeetan egiten zuten ogiaren zatitzea, eta pozik eta bihotz xaloz jaten zuten elkarturik, Jaungoikoa goretsiz. Herriak begi onez ikusten zituen, eta egunero Jaunak haien artera biltzen zituen salbatzen ari zirenak.

ERANTZUN SALMOA: Sal 117, 2-4. 13-15. 22-24

**R/. Eskerrak Jaunari, ona baita,
 Haren maitasuna betikoa baita.**

Edota: **Aleluia.**

Israel etxeak hau esan beza:

«Haren maitasuna betikoa.»

Aaron etxeak hau esan beza:

«Haren maitasuna betikoa.»

Esan bezate Jaunaren beldur direnek:

«Haren maitasuna betikoa.» R/.

Gogor bultzatu ninduten erortzeko,
 han zegoen Jauna ni laguntzeko.
 Nire indar eta nire kemen Jauna,
 Hura gertatu da nire salbamena.

Poz eta garaipen-oihuak
zintzoen etxolan. R/.

Etxegileek baztertutako harria,
berori gertatu da giltzarria.
Jaunak egin du hori,
gure begien harrigarri.
Hau da Jaunak egin duen eguna,
gu pozteko eta alaitzeko eguna. R/.

II. IRAKURGAIA: 1 P 1, 3-9

*Itxaropen bizirako sortu gaitu berriro,
Jesu Kristoren hilen artetiko piztueraren bidez.*

San Pedro Apostoluaren epistolatik

Bedeinkatua Jaungoikoa,
Jesu Kristo gure Jaunaren Aita,
bere erruki haundiaz
itxaropen bizirako sortu baikaitu berriro,
Jesu Kristoren hilen artetiko piztueraren bidez,
ustelik, lohirik eta zimelik gabea den ondarrerako;
eta hau zuentzat zeruetan jasota dago.
Jainkoaren indarrak iraun erazten dizue sinesmenean,
azken aldian agertzekoa den salbamenerako.

Poztu zaitezte horretan, oraingoz zenbait estuasunetan alditxo batez nahigabetuak izan behar baduzue ere. Horrela agertu da zuen sinesmena –sutan garbitzen den urre galkorra baino askoz bikainagoa–, eta Jesu Kristo agertzen denean, iritsiko du saria, aintza eta goralpena. Jesu Kristo ikusi ez duzelarik ere, maite duzue; ikusi gabe, Berarengan sinesten duzue, eta esan ezin halako poz haundiz alaitzen zarete; eta horrela zuen sinesmenaren helburua iristen duzue: zeuen salbamena.

EBANJELIOA: Jn 20, 19-31

Aleluia: Jn 20, 29

R/. Aleluia.

V/. Ikusi nauzulako sinetsi al duzu? –dio Jaunak–;
zoriekoak, ikusi gabe sinesten dutenak. R/.

Handik zortzi egunera, berriro agertu zitzaizen Jesus.

Jesu Kristoren Ebanjelioa San Joanen liburutik

Astearen lehenengo eguneko ilunabarrean, etxe batean bildurik zeuden ikasleak, atek itxita, judutarren beldurrez. Sartu zen Jesus eta, haien erdian zutik, esan zien: «Bakea zuekin». Hori esanda, eskuak eta saihetsa erakutsi zizkien. Eta ikasleak pozez beterik gelditu ziren, Jauna ikustean.

Jesusek berriz ere: «Bakea zuekin. Aitak Ni bidali nauen bezala, Nik ere bidaltzen zaituztet zuek». Eta hori esanez, haizeman zuen haien gainera, eta esan zien: «Hartzazue Espiritu Santua: zuek bekatuak barkatzen dizkiezuenei, barkatuak gelditzen zaizkie; eta lotzen dizkiezuenei, lotuak gelditzen zaizkie».

Tomas, ordea, Hamabietako bat, Bizkia zeritzana, ez zegoen besteekin batean Jesus etorri zenean. Beste ikasleek esan zioten: «Jauna ikusi dugu». Tomasek, ordea: «Haren eskuetan iltzezuloak ikusten ez baditut, nire behatza Haren iltzezuloetan sartzen ez badut, eta nire eskua Haren saihetsean, ez dut sinetsiko».

Handik zortzi egunera, berriz ere barruan zeuden ikasleak, eta Tomas haiekin. Sartu zen Jesus, ateak itxirik zeudela, eta haien erdian zutik honela esan zien: «Bakea zuekin». Gero Tomasi: Ekartzu behatz hori, hona hemen nire eskuak; ekartzu esku hori, eta sar ezazu nire saihetsean; eta ez izan sinesgogor, sinestedun baizik».

Tomasek erantzun zion: «Ene Jauna eta ene Jaungoikoa!» Eta Jesusek: «Ikusi nauzulako sinetsi al duzu? Zorionekoak, ikusi gabe sinesten dutenak».

Beste ezaugarri asko ere egin zituen Jesusek bere ikasleen aurrean; baina ez daude idatzirik liburu honetan; idatzirik daudenak, honetarako daude idatzirik: sinets dezazuen Jesus, Mesias dela —Jaungoikoaren Semea—, eta hori sinetsirik, Haren izenean bizia izan dezazuen.

Oparigaien gainekoa

Onar, Jauna, zeure herriaren
[eta bataiatu berri hauen] eskaintzak;
sinesmenak eta Bataioak biziberriturik,
betiereko zoriona irits dezagun.
Jesu Kristo.

Prefazioa: Pazkoaldikoa.

Jaunartze ondorengoa

Jainko ahalguztiduna,
iguzu, Pazko sakramentuetan hartu dugun graziak
iraun dezala beti gure bihotzetan.
Jesu Kristo.